

玉臺新詠集

一

玉臺新詠集
卷之四
玉臺新詠集

玉臺新詠集序

陳尚書左僕射太子少傅東海徐陵孝穆撰

夫凌雲槩日由余之所未窺千門萬戶張衡之所
曾賦周王璧臺之上漢帝金屋之中玉樹以珊瑚
作枝珠簾以玳瑁爲柙其中有麗人焉其人五陵
豪族充選掖庭四姓良家馳名永巷亦有潁川新
市河間觀津本號嬌娥曾名巧笑楚王宮裏無不
推其細腰衛國佳人俱言訝其纖手閱詩敦禮豈
東鄰之自媒婉約風流異西施之被教弟兄協律
少小學歌長生河陽由來能舞琵琶新曲無待石

崇箜篌雜引非關曹植傳鼓瑟於楊家得吹簫於
秦女至若寵聞長樂陳后知而不平盡出天仙閑
氏覽而遙妬至如東鄰巧笑來侍寢於更衣西子
微嚙得橫陳於甲帳陪遊馭娑騁纖腰於結風長
樂鴛鴦奏新聲於度曲粧鳴蟬之薄髻照墮馬之
垂鬟反插金鈿橫抽瑤樹南都石黛最發雙蛾北
地燕支偏開兩靨亦有嶺上仙童分丸魏帝腰中
寶鳳授曆軒轅金星將婺女爭華麝月與姮娥競
爽驚鸞冶袖時飄韓掾之香飛燕長裾宜結陳王
之佩雖非圖畫入甘泉而不分言異神仙戲陽臺

無別真可謂傾國傾城無對無雙者也加以天時
開朗逸思雕華妙解文章尤工詩賦琉璃硯匣終
日隨身翡翠筆牀無時離手清文滿篋非唯芍藥
之花新製連篇寧止葡萄之樹九日登高時有緣
情之作萬年公主非無累德之辭其佳麗也如彼
其才情也如此旣而椒宮宛轉柘觀陰岑絳鶴晨
嚴銅螭晝靜三星未夕不事懷衾五日猶賒誰能
理曲優遊少託寂寞多閒厭長樂之疎鍾勞中宮
之緩箭纖腰無力怯南陽之擣衣生長深宮笑扶
風之織錦雖復投壺玉女爲歡盡於百嬌爭博齊

姬心賞窮於六箸無怡神於暇景唯屬意於新詩
庶得代彼臯蘇蠲茲愁疾但徃世名篇當今巧製
分諸麟閣散在鴻都不籍篇章無由披覽於是然
脂暝寫弄筆晨書選錄艷歌凡爲十卷曾無叅於
雅頌亦靡濫於風人涇渭之間若斯而已於是麗
以金箱裝之瑤軸三臺妙迹龍伸蠖屈之書五色
花牋河北膠東之紙高樓紅粉仍定魚魯之文辟
惡生香聊防羽陵之蠹靈飛太甲高擅王函鴻烈
仙方長推丹枕至如青牛帳裏餘曲旣終朱鳥窓
前新粧已竟方當開茲縹帙散此綰繩永對翫於

書幃長循環於纖手豈如鄧學春秋儒者之功難
習竇專黃老金丹之術不成固勝西蜀豪家託情
窮於魯殿東儲甲觀流詠止於洞簫變彼諸姬聊
同棄日猗歟彤管無或譏焉

王臺新詠集序

玉臺新詠目錄卷之一



古詩八首

古樂府詩六首

枚乘

雜詩九首

歌詩一首

李延年

詩一首

蘇武

羽林郎詩一首

辛延年

怨詩一首

班婕妤

董嬌嬈詩一首

宋子侯

漢時童謠歌一首

同聲詩一首

張衡

贈婦詩三首

秦嘉

秦嘉妻荅一首

徐淑

飲馬長城窟行一首

蔡邕

飲馬長城窟行一首

陳琳

詩五首

徐幹

室思詩一首

又

情詩一首

又

定情詩一首

繁欽

古詩爲焦仲卿妻作

無名氏

玉臺新詠卷之一

古詩八首

其一

上山採藤蕪下山逢故夫
長跪問故夫新人復何如
新人雖言好未若故人姝
顏色類相似手爪不相如
新人從門入故人從閣去
新人工織縑故人織素縑
日一匹織素五丈餘將縑來比素
新人不如故

其二

慄慄歲云暮
蟋蟀多鳴悲涼風率已厲
遊子寒無

衣錦衾遺洛浦同袍與我違獨宿累長夜夢想見
容輝良人唯古歡枉駕惠前綏願得常巧笑携手
同車歸既來不須更又不處重關諒無晨風翼焉
得凌風飛眄睐以適意引領遙相睎徙倚懷感傷
垂涕沾雙扉

其三

冉冉孤生竹結根泰山阿與君爲新婚菟絲附女
蘿菟絲生有時夫婦會有宜千里遠結婚悠悠隔
山陂思君令人老軒車來何遲傷彼蕙蘭花含英
揚光輝過時而不採捋隨秋草萎君亮報高節賤

妾亦何爲

其四

孟冬寒氣至北風何慘慄愁多知夜長仰觀衆星
列三五明月滿四五蟾兔缺客從遠方來遺我一
書札上言長相思下言久離別置書懷袖中三歲
字不滅一心抱區區懼君不識察

其五

客從遠方來遺我一端綺相去萬餘里故人心尚
爾文彩雙鴛鴦裁爲合歡被着以長相思緣以結
不解以膠投漆中誰能別離此

其六

四座且莫誼願聽歌一言請說銅爐器崔嵬象南山上枝似松柏下根據銅盤雕文各異類離婁目相聯誰能爲此器公輸與魯班朱火然其中青烟颺其間從風入君懷四座且莫歡香風難久居空令蕙草殘

其七

悲與親友別氣結不能言贈子以自愛道遠會見難人生無幾時顛沛在其間念子棄我去新心有所歡結志青雲上何時復來還

其八

穆穆清風至吹我羅裳裾青袍似春草長條隨風
舒朝登津梁山褰裳望所思安得抱柱信皎日以
爲期

古樂府詩六首

日出東南隅行

日出東南隅照我秦氏樓秦氏有好女自言名羅
敷羅敷善蚕桑採桑城南隅青絲爲籠繩桂枝爲
籠鉤頭上倭隨髻耳中明月珠綠綺爲下裳紫綺
爲上襦觀者見羅敷下檐捋髭鬚少年見羅敷脫

巾着幬頭耕者忘其耕鋤者忘其鋤來歸自相喜
但坐觀羅敷使君從南來五馬立踟躕使君遣吏
往問此誰家妹荅云秦氏女且言名羅敷羅敷年
幾何二十尚未滿十五頗有餘使君謝羅敷寧可
共載不羅敷前置辭使君一何愚使君自有婦羅
敷自有夫東方千餘騎夫婿居上頭何以識夫婿
白馬從驪駒素絲繫馬尾黃金絡馬頭腰間鹿盧
劍可直千萬餘十五府小吏二十朝大夫三十侍
中郎四十專城居爲人潔白皙髯々頗有鬚盈々
公府步冉冉府中趨坐中數千人皆言夫婿殊

相逢狹路間

與樂府極異爲

相逢狹路間道隘不容車如何兩少年挾轂問君
家君家誠易知易知復難忘黃金爲君門白玉爲
君堂堂上置樽酒使作邯鄲娼中庭生桂樹華燭
何煌々兄弟兩三人中子爲侍郎五日一來遊道
上自生光黃金絡馬頭觀者滿路傍入門時左顧
但見雙鴛鴦々々七十二羅列自成行音聲何囀
囀鶴鳴東西廂大婦織羅綺中婦織流黃小婦無
所作挾瑟上高堂丈人且安坐調絲未遽央

隴西行

天上何所有歷歷種白榆桂樹夾道生青龍對道
隅鳳凰鳴啾啾一母將九鵠顧視世間人爲樂甚
獨殊好婦出迎客顏色正敷愉伸腰再拜跪問客
平安不請客北堂上坐客羶氎觥清白各異樽酒
上正華疏酌酒持與客客言主人持却略再拜跪
然後持一杯談笑未及竟左顧勅中厨促令辦饌
飯慎莫使稽留廢禮送客出盈々庭中趨送客亦
不遠足不過門樞取婦得如此齊姜亦不如健婦
持門戶勝一大丈夫

艷歌行